

四庫全書

集部

欽定四庫全書

誠齋集卷一百十

宋 楊萬里 撰

尺牘

答虞侍郎

某伏以即日廩秋暑退新涼入郊恭惟侍郎左史舍人
國史尊契丈玉立甘泉天集忠蓋台候動止萬福某老
病衰伏已迫夕曛擁隕餘生未先朝露天上故人憐我

祇荷祇荷魯僖之詩不云乎萬有千歲眉壽無有害少
陵之詩不云乎雲霄今已逼台袞更誰親敬賦二詩以仰
祝焉伏惟財幸

某惶恐再拜進越敬問金堂玉室之宅安期羨門之姥
即日恭惟尊尊幼幼受祉山則某老矣無能為役若曰
取履結襪尚堪指縱也長者諏及陸賈徧觀諸子南昌
大兒去之尺有咫尚未能作意一往矧其餘乎退之云
東西南北皆欲往千山隔兮萬山阻一笑然中男次公

秩滿將來歸矣

某薦蒙別紙鐫諭斐然之文欲求當代名流善書者書之以入石敬聞命矣抑非元次山之頌莫稱魯公之妙畫非六一先生東園之記莫稱闕之奇字某也何人乃承此寵悚仄悚仄

答周丞相

某昨委材翁攜擬試詩賦呈似不敢奏記蓋恐仰而塵玉宇之報今反拜賜華袞之褒榮恩交加也六王畢日五

色本是丞相擢桂之長技某本以墨義進而敷安石之
洛詠焉其廣額半眉舞袖郎當手足俱見矣昔半山老
人公譙觀優未嘗解顏而一日偶對之不覺一粲或以
問公公曰吾久思咸恒二卦不得其義適得之而喜耳
某或者獻笑而適遭其喜乎摧謝不莊仰惟原亮

答澧州趙知府

某屬者寄箋不量老朽退休之人進越以親戚吳推薦
仰於中二千石親民任使之京削挾今之請行於今之

俗是犯二不韙焉觀勢涼燠者今俗其不然乎大兒長孺嘗得京丞相而作親札薦於朝疇不謂勢之燠者莫相君若也而尚不功以其非言路非執法之書也然則燠中差煖而不能炮烙我者亦不能動悟也况某退休冰氏之人乎此其犯不韙一也昔祁大夫舉其子君子不以為私近呂文穆公舉其猶子文靖至謂有宰相才當時間者不以為欺至於齊暉則有司以其為宰相映之弟而不敢取焉某何人薦其戚黨於執事其不曰私

且欺乎此其犯不韙二也乃執事度越一世之拘學追還千古之奇偉得其書躍如也舉其人沛如也人且報之曰來書之品題人物一言一字無非真實語矣退之云大夫不疑人欺已僕何足道哉微執事孰可以當退之之所云者乎多言何足以謝大恩之萬分獨以居今之俗行古之道為執事賀也

答福州帥張子儀尚書

某屬者奏記仰干筆端之膏潤牒試王親茲辱報教聽

請竊聞熱官要人求者不少皆弛弛距之獨曲徇一故
交野人之求薦舉不以勢而奪交游不以寒而棄萬物
皆流金石獨止孟子所謂豪傑之士不在門下其將焉
在寸心感服靡有量數疇昔呼偷兒之簡遂玷鐫鏡送以
墨本覽之汗如水漿可以為縱筆浪言者之戒矣傳聞
三山公帑有唐文粹大字板本嘗求一編以遮老眼未
拜賜何也得寄王應衍秀才許無沈浮耳

與權運使

某惶恐敬致迫切之懇女夫子修職郎泰寧縣丞陳經
瞻於學問工於詞章臨民庶惠遇事勤敏蚤年登庚戌
科第前任為吉水主簿今者適有天幸乃獲駿奔趨事
于卿月使星之末光天其或者將與之挿羽翰而雲飛
脫泥塗而淵泳也某過不自量其老退之蹟輒恃與台
座前有同朝十五年之舊後有鄰邦二千石之庇僭致
古人內舉不避親之懇上千筆端膚寸薦進之潤竊推
陳丞前任未滿而解官今任通理至來歲之冬乃成三

考妄意欲望台座特輟嘉泰三年上半年一京削以為
破白之舉名賢一唱諸臺必和倘辱未忘貧賤之交尚
篤金石之契驩然收卹仍乞來歲先賜照牒以慰老懷
信其有可望之期也仰惟此不報之恩泰華未為重渤
澥未為深豈惟陳丞得出門下實某得出門下也一寸
丹心天實臨之

與周丞相

某宿昔奏記且以虞公銘詩呈似一寸丹心端欲求指

畫之益非以微浮實之譽也乃上勤鈞翰之報至假以子長之褒且謂彪固而下不論閭命辟易汗背頰顏抑某偶當虞氏兄弟授簡之責永懷知己不報之恩舍已不承復誰諉者黽勉下筆所謂傖父學人作贅語兒童羅益效樽俎者仰睇彪固之門牆尚不敢充員於衙官筆吏之列而何暇子長之譏也乎非小人不肯之患子長不肯之患也汰哉丞相專以文許人乎至以子長許人乎此抑所云不爾則人不果獎者乎亟掩荀躁之耳

未敢頻包胥之首也以榮以慰以感示教當改為
神道碑即以登時剔改書丹矣至如書史誤以勑為戮
亦蒙是正而文病之尤者乃獨不揮匠石斲鼻之斤不
試鑿生洗腸之方豈姑摘其細以塞其求新其妙而不
屑於教乎再作得一書答虞氏兄弟今納一本不寧唯
發仲尼之一莞猶未絕望於竄走之誨

與隆興張帥

某惶恐小稟女夫子修職郎新泰寧丞陳經贍於學問

工於詞章早年登庚戌科第前任為吉水簿今茲之官
泛舟之役塗出南浦欲膝行於橐兜戟纛之前茅以望
見台斗喉舌之末光仰惟一世之儒宗文師天下之鉅
人長德謂之進而不拒使得瞻仲尼之日見老子之龍
後進之士如天之福何以代此進越惶恐

與本路提舉張郎中

某惶恐小稟女夫子修職郎新泰寧丞陳經工於詞章
達於吏事早年中庚戌榜前任主吉水簿今茲之官汎

舟之役道出臨川仰慕一代名德之尊願瞻八使光華之末敢望戶郎不拒連教謂進俾得以觀道德而聽教誨不勝後進之榮躍

某惶恐再稟大兒南昌令長孺無能不才適有天幸乃獲充負弩先驅之小吏願追隨掃門舍人而不得敢謂台座攬轡之初小子奏記之日遽蒙灑寫士之墨剡陟明之章先之以照移申之以奏牘舉詞褒榮恩意山峩蓋下土鰥生欲求而未敢發者顧縉紳先生未見而先

收卹之老身榮懷罔有藝極空臆摧謝萬不一陳仰惟
原省

與本路提刑彭郎中

某惶恐仰恃天上知己二十年之雅敢僞行避影進越
致迫切之懇大兒南昌令長孺無能不才適有天幸乃
獲充負弩之先驅被二星之末光全度盡護粗安庀職
竊斗食以活具孥未在西曹適滿之科荷載恩私盡室
同心也重念此兒自幼訓以一卷之書年十有八嘗忝

鄉薦技能淺陋竟以門子而進故隨在千官之底仰惟
台座一世之儒宗文師四海之鉅人長德餘論所及枯
枿再春敢望不靳筆端膚寸之潤誕真屬吏薦墨之後
或以奏課或以察廉或以陞陟或以十科或以所知一
字拜嘉皆踰華袞靡有細大莫非異恩第得在狄梁公
桃李之園某死不恨矣不避古人舉子之私上千膚使
拔士之牘一寸丹心不任惓歎頃嘗預稟矣

謝隆興張帥薦大兒

某惶恐大兒南昌令長孺無能不才適有天幸乃獲充
員牛馬之下走仰依台斗之末光玉振之所開明慶雲
之所覆露受容受察成始成終此惠已萬萬不貲矣敢
謂蒙國士之知度越百輩特灑薦士之墨剡發陟之章
孝友問學慈祥公勤顧小子未能於一焉拜舉詞難并
之四者矜其榮則華袞未緝較其恩則岱宗猶輕父子
懷仁縻捐莫報泚筆摧謝未究萬分仰惟台察
答趙戶送糟蟹回送黃雀并黃雀肝心醬

糟丘解系久矣寄絕交之書詩人審言惠然送解顏之
味酌綠醕而延問吐黃中而載欣箸以籌之觥之罄矣投
桃報李媿瓊英玉案之兩無披繇多脂與心腹頭顱而
俱往薄言藉手不稱所蒙伏惟原宥

送周丞相蒸蟹

某惶恐彭蠡郭索二十輩用四明法蒸之以獻極知戒
殺故不敢生致免使校人畜之池亦不須送與江夏黃
祖也一笑既微且瀆不勝主臣

答雷運使

某伏以即辰凜秋暑退顥氣高寒恭惟都運煥章吏部
玉節天倚霜臺風飛羣黎載歌高厚咸若台候動止萬
福某漁釣一壑過者弗顧而霄漢繡衣軫一日雅遣行
李墮素書重幣以將其意名酒以接其驩誨之養生則
有隱居所注之編被以仁風則有晉人所揚之扇休之
煥之恩斯勤斯比殆執事將挽回古人之光芒以甄治
未造之澆漓而為是舉也不然反躬自視無以堪之世

俗感藏推謝之語乃無一二可以藉手報嘉惠也光通之侍未知曷日詩不云乎四方既平王曰遄歸又不云乎萬有千歲眉壽耆艾歌賦二詩以頌焉仰惟財幸

某竊惟則行則藏聖賢之高致有光有晦古今之盛節歷選昭代時則有若都運煥章吏部經世之學遐有淵源華國之文絢於藻火是故立之春風玉筍之班而不為泰分之帥閫使輶之勤而不為淹建之頻年卷而懷之退藏於道林嶽麓湖山之幽深追逐乎紫巖南軒名

德之芬香其處也濛濛如隱山之玉草木被其光輝其
出也垂垂如出岫之雲海宇徯其膏潤自西徂東持京
兆扶風之節復自北而南為西山東湖之游往來容與
皆裕如也此其中必有大過人者而世何足以知之哉
天之祐宋為之生賢必不為江右一道計昭昭矣退之
云胡不均宏俾執事樞今日此責將有在矣金馬碧雞之
訪豺狼狐狸之問未敢以為門下賀

某惶恐進越再拜敬問金堂玉室之宅安期羨門之壺

即日恭惟中外尊雅受祉山則某老矣無能為役抑取
履結襪尚堪指縱某惶恐敬致賤懇大兒長孺無尺寸
長適有天幸得充負弩之下走不勝大願願老先生薰
以道德之馥飲以仁義之膏燾之以仲尼上律之天振
之以北海薦士之墨使得為門下桃李廐中病顙實如
天之福闔族之榮也一寸丹心髦髦悃悃

答全州知府陳秘書

某伏以凜秋暑退風露高潔即日恭惟判府秘書契文

作藩政成民頌豈弟天棐忠貞台候動止萬福某老病
餘生棄官十年懸車三載雖未先朝露而自絕於斯世
久矣姓名不徹於朝貴書紙不抵於故舊如契丈之賢
而又有四十年與游之雅而亦不敢以一字相聞雲泥
相望車笠相遼其勢則然耳而風誼拔俗意氣邁倫不
遠千里遣一介行李墮雲錦之書訪生死於寂寞之濱
篤久要於平生之言此非今人之事古人之事也顧施
之於獨冷之間人則所謂賢者過之者歟摧謝有陳萬

此寧足出處殊轍何從晤對鄉若太息願言乃玉在躬
以棟吾道即歸視草

某惶恐再拜敬問契家台嫵即日恭惟尊稚受祉山則
有委不外伏辱四幣二蕉斑箔非環堵之所宜有者拜嘉
珍感之至

答虞制叅

某伏以維孟之冬新寒告至恭惟恩館制叅直閣燕居
潭府德名彌高天集忠賢台候動止萬福某棄官十載

謝事三年老病推墮幸安田里慶雲之蔭景星之光實
衣被之揆厥所元感幸萬萬惟東序之金鐘大鏞西望
邇在天半安得小叩舂容之聲以啓謏聞敢請謹納馮
戒羞服卽膺一札十行之詔徑歸三事大夫之班

某伏自壬辰之秋雍國老先生躋台鼎拜孤保諭蜀父
老之日面請鈞旨一見東閣之行馬得瞻琪樹而聆玉
振乃知傳鯉庭獨立之訓贊揆路奮熙之功自有人也
竊喜竊歎此生端不虛矣回首舊事便三十年人生幾

何良可太息野人既歸林下而直閣抱負經世致主之
業潛稱韞櫝自玩其光不屑小出而一施之使朝家不
獲蒼舒庭堅世濟之用天下不睹韋賢玄成相業之繼
獨非缺歟遠辱雲錦之書嘗草草叙報是時臂疾舊疾
偶作令女壻陳丞代執管城至今震惕開州人再至乃
能具短書以謝伯仲長牋之辱老先生銘詩併以呈似
茲不重陳

某惶恐再拜敬問恩閔玉嫵即日冬寒恭惟尊尊幼幼

受社山則有委不外蒙寄贈紅紫素羅三十匹下拜珍
感之至婺羅木錦各二匹聊伴空函匪報也兒輩辱問
勞長孺次公幼輿皆之官未及奏記以謝先生長者之
賜也

答虞知府

某伏以良月有倣氣露高寒即日恭惟恩舒判府直閣身
作長城卧護國西威惠用章天人咸贊台候動止萬福
具犬馬之齒今七十有五矣已迫夕曛未先朝露微我

故人燭之以末光何以逮此蜀月楚星相望各天一方
安得對床聽雨握手論文以寬此心之鬱陶願言金玉
大業棟幹皇家即奉綠綈遂寫紫禁

某伏自辛亥之春東來紫氣照臨鍾山石城之間初得
瞻北斗之碧梧鸞鵲望東山之玉樹芝蘭蓋雍國老先
生之典刑文獻盡在魯矣盛德有後老身定交自賀兩
得之也語離一星晝思夜夢曷嘗不在鉅鹿下某棄官
歸老山間乃以壬子之秋也三請還笏始僂得之寒灰

枯草過者掉臂伯仲間尚記憶老門生耶雲錦之書珠
玉之唾訪問生死慰存寒酸詞旨劬愉意氣傾豁老病
餘生抵掌頓足覺生意頓回霜毛再玄也惟經世之學
濟美之才小淹外庸日竚光顯如范氏之堯夫呂氏之
晦叔此所願於伯仲者老先生碑文已付便了也短書
以謝長牋之辱茲不重出云

某惶恐再拜敬問恩閔玉嫵即日冬寒恭惟尊尊幼幼
受祉山則有委不外蒙寄貺紅素羅十有四匹及太平

治迹老先生制集下拜珍藏之至建本詩集一部木錦
一端聊伴空函匪報也

答湖北唐憲

某伏以即辰良月應期初寒戒候恭惟提刑太中尊契
大體上好生作民司命霜凜百吏春熙羣黎天人孚休
台候動止萬福契家玉嫵受祉無艾某老病餘生死灰
不然貴者所棄舊者所忘也今茲遠蒙一介行李墮以
雲錦之書勞苦酸寒訪問生死此古人盛德之事非今

世未造之有者而又寵寄葛洪岵嶽之塵罔非玉床箭
鏃之英虹氣貫巖寶光浮鼎老者得此隱居扶衰却老
之劑仙人長生不死之珍惜未能死籍之可落猶庶幾
臞骨之再腴霜鬢之又玄也九頓以謝嘉惠累百言而
未宣寫耳小兒幼輿孺子不足進於先生長者之門仰
辱招致之幕下自媿素餐旬返賤職而挽留不置恩禮
益篤老懷感激何有終窮出處異轍安得再望見青天
白日之清明願言愛重盛德大業即還雞翹豹尾之班

答彭侍郎

某伏以卽辰雲葉護霜風刀剪水恭惟觀使待制侍郎
尊契丈淵兮萬物之宗游乎九垓之上天人咸若台候
動止萬福某老病之身已迫夕曛未先朝露芒寒旁燭
君之餘也極知孤搢逸韻高蹈事外闔扉以謝襜襪下
帷而對聖賢其名或可得聞而其人不可得而見曲肱
飲水其樂也天所謂豈不實辛苦所思非饑寒不賴固
窮節百世當誰傳者耶我欲從之慨其室則邇也奉教

告灑然便對面豁然頓失心疾吃吃王秀才定不凡耳
已約渠惠顧當掃廳作一日談也諸封胡孰仕孰居皆
未及共戒語辱諏及兒輩皆景升兒子耳長者記憶以
榮以感未見願言珍重以棟斯文

答周監丞

某伏以即辰滕巽胥命雲師來同恭惟致政提舉監丞
尊契文集芙蓉以為裳折若木以拂日天人盡護河嶽
給扶台候動止萬福某老病併至幽獨無侶有可樂者

其惟海內名勝平生故人一笑一談一觴一咏之間乎
千江隔萬山阻海內姑舍是也烟火相接雞犬相聞如
吾二人尚可諉曰疏乎哉一居白鷺之北一居青原之
東一葦可杭而其室則邇其人甚遠每一念之作惡數
日屬者奏記以寫我心以管城老矣罷於傳言赤鯉蠹
爾拙於寄聲心之精微欲徹於下執事何繇而徹也答
教之返真以玳報李也把翫未釋而漢水白鱗又將一
封雲錦而至矣金聲玉振駭洞几杖華星秋月淵曜耳

目雙篚佳實千顆勻圓初疑得成紀黃龍之珠又似弄
王孫精金之丸驚喜無端不敢專饗偶有剝啄納謁者
自贊曰麴秀才也亟延上坐入坐觴而俎之欣然兩家
之難解灑然五斗之醒析矣占謝不敏末後一語惟曰
后皇之嘉橘與臣朔之桃爭歲月論春秋云

答隆興張尚書

某謹已公牘以謝宮壺之賜存奉真翰以示意氣之勤
且分似于湖先生之金書兼之友于家問之新刻至於

君明臣良之大字赴官臨風之留題大篇短章日光玉
潔銀鈎鐵畫鳳翥鸞翔至寶滿前窮兒驟富降拜驚喜
榮感萬斯某屬嘗奏記以謝大兒陞陟之章繼辱報教
再有後日特剡之議得玉求劍敢萌此心一諾千金益
深謝臆附見於此併祈台察

謝彭提刑薦南昌大兒

某恭承名節以趨介主入覲亟奏記以賀屢復哦詩而
餞行在野人既蒙報珎之戕而大兒復被薦鶚之表建

請擢用式勤臣工至於超尚行能之著聞庶謹剛方之
獨立一之為甚四者難并華袞不足以諭褒嘉之榮泰
嶽不足以擬恩紀之重降拜銜戢謝詞周諄藏之中心
言之不足仰惟台慈賜之下燭

答李厚之知縣

先丈竹林先生銘詩今驛送呈似別殷事恐非不詭於
教者政犯鄂王府之大禁也故徵其辭秦漢以前無塔
字韻書云浮圖也故易而榻亦傳以豫章懸榻之土風

望示報庶知不作石頭驛耳

答胡撫幹仲萬

某伏以即日近臘如春恭惟仲方撫幹學士鄉兄賓贊
戎閫天棐賢哲台候動止萬福某老病世所擲於道旁
者每蒙書札訪問生死公自為德吾何取也吾州又添
一趨班人未足為賀添一詩人真足為青原山賀矣龍
山十詩其味黯然而殊有后山風致使阿溫老兵知之
追恨當時坐上初無此客子耳嗟嘆不足卷而復舒無

論餘子老夫亦當避路澹菴先生有孫季永亡友有子
此何可當也來歸邇止豫為兆喜願言珍重臺家即以
鸞臺鳳閣貯之某悚息再拜敬問契家六珈九鳳月上
即日尊雅均祉餉乾桃及書箔佳甚降拜珍感兒曹荷
聲次公于前月二十五日秩滿計漸當歸尚未至也

答王晉輔

某伏以即日臘雪瑞歲恭惟晉輔上舍鄉友茹古之餘
神介尊候萬福某老病怯寒方願隱於臍以附似紅之

火乃蒙一介行李踏瑤瑤之迹詒書札以慰存之北果
白燭惠然朋來今夕濁醪真不孤寒須專春二字小侯
霽暉呵筆炙硯勉為作也願姑徐之近詩未欲拈出幸
察

答周監丞

某伏以若歲春秋益國已免其奏記贈我錦繡乘成復
詣於多儀高詞清鏗笙鏞以間至寶琤琢金玉其相如
遺百味之蘭生侑以四老之橘戲淮泗入舟之白湖海

半穀之黃初凝食指之予欺頓使饒涎之泉湧銜戢不
淺憂虞實多昔歲有北杏之盟闕敢為於戎首今茲報
東門之役罪難追於過先願夜豎於降幡勿後來之反
旆頓首哀籲拊心戰兢謹具劄子摧謝仰惟台察

與周監丞

某伏以即辰平地尺雪允霽益寒恭惟致政提舉監丞
鄉丈飲瀝餐霞御風騎氣與造物而同遊與泰初而為
鄰三神交歸純嘏畢至台候動止萬福金臺玉堂之室

安期美門之媿尊尊幼幼錫羨惟鈞某主臣敬以今茲
嗣歲將興端策遇泰陰外陽內小往大來是為君子道
長之辰丕應五福類升之慶某生涯短褐行李長饒願
隱於臍方縮焉而如蝟風其次女覺煖然而倡春敬上
三百一斗之觴仰祝千二百歲之壽謹具劄子陳賀恭
惟台察

某惶恐上覆吾州大禁不敢以茅柴觸網帥司襟帶堂
乘壺北果四套進越為壽蒙不麾去有萬其幸

慰秦宰

某恭聞護堂太宜人壽考康強第祿無艾如魯傳之母
如戴勝之仙謂宜萬有千歲以享榮養不審何恙靡已
遽至大故聞訃悼心怛然恭惟愛孝如曾子純孝如考
叔驟罹哀疚何以堪之某老病待盡不克奔弔敬修尺
疏以寫慰不腆奠儀布之別楮恭惟台察山川悠遠護
歸勤止願言裁哀以襄大事有委不外

答福帥張尚書

某伏以即辰梅歲餞雪柳風迎春恭惟判府安撫閣學
尚書尊契天上即閩府移鎮蘇臺尺五近天一星朝斗
高厚送喜台候動止萬福某老與病偕胥會而集夕曛
無幾朝露未先天上故人憫之載之以及於斯也新除
家便頗似永叔覓蔡以近潁然上意有在當如君實赴
陳而過闕為賈後賀而任安先書已重知不敏之忤矣
至於蘇司業之酒錢蔡君謨之玉鉤羅池之焦荔嘉惠
狎至拜辱不暇瓜牛之廬殆塞欲破感戢恩意南山之

竹不足寫此懷抱也禊堂新記示教古之兄弟繼重為
郡漢人詫為盛事播之風謠特未睹祖孫先後迭建戟纛
於元戎之間耳潞公德威之堂其子作之坡記之豈若
當家之坡自記之哉絕妙好辭前無古人矣惡詩寄題
別楮錄去或可附記碑陰否未見君子願言珍重即登
鈞樞以世厥官

答贛州薛侍郎

某伏以即辰元夕將臨寒暄方戰恭惟判府侍郎尊契

大卧護上流外撫百粵惠化威譽民頌天廸動止萬福
某老病餘生犬馬之齒今年七十有六矣棄官於壬子
之秋乞骸於丙辰之春聖恩特異玉音宣諭京丞相云
楊某官簿之年未及章却復上至己未之冬乃得謝衣
冠長為農夫以沒世矣道旁老櫟過者不顧契丈不我
歎遺尚軫鸞臺樞府偕緣之雅若節春秋必修時事移
書以訪生死送酒以通慙懃顧僕無淵明之高公有王
公之賢公奚負於僕僕有愧於公耳鎖江主人能置酒

願渠且住莫終更但賦山谷之詩以抒銜戢之衷也然
天生大賢必使澤四海豈獨詘之外庸以私庇一野人
乎前言戲之耳魯公平易近民之政王褒中和樂職之
詩類非俗吏所能為也下轉上聞歸巖廊秉鈞樞可倚
而俟惟貴珍大業以對越焉

某惶恐再拜僭易敬問契家台春春寒恭惟尊尊幼幼
受祉山則益公與野人同居一邦信如諭弟野麋山鹿
畏入州府已未之冬聞益公新樓落成即駕柴車一往

觀焉而州郡即招以公譙繼以臺餽是樂克從子教子
興無戒心也因與益公相視而笑一揖徑歸雖却其禮
而得免焉自此每有相思折簡而已蒙問故及山間有
可委否

與新吉守劉伯協

某伏以即辰天氣澄穆風物閒美恭惟判府太中十乘
啟行五馬南來千里載歌三神送喜台候動止萬福某
敬齋宿奏記以逆執事之顏行仰惟財幸

某蓋嘗選近世人物之盛莫江西若者而江西人物之
盛又莫劉氏若者公是公非二先生偕以道鳴如古文
篇何必減原道如弟子所記何必減法言如西垣訓詞
何必減西京家傳正學之派心授斯文之脉不在執事
而誰在乎宜其根諸心形諸事敷諸政者類非俗吏之
所能為也所居民富所去見思郴江之畔至今手之舞
之吾州適有天幸上賜仁侯然州民則有其來何暮之
歌臺家必有無疾其驅之詔朝野爭賢若為應之盍亦

一臨吾州吾月報然後寄徑乎郎宿御月之躔橫驚乎
簪筆持橐之地政未遲耳某也亦歌暮一人之數者輒
用採民言哦為短啓以代秉章之先或辱一覽而抵諸
地

某惶恐再拜進越敬問金堂玉室之宅安期羨門之姥
即辰恭惟尊尊幼幼茂介春祺某老病無用抑尚堪取
履結襪也

答王監簿

某伏以即辰春事強半寒氣未歸恭惟判府監簿契天
至孝欽承几筵天棐孝思孝履支持萬福某老病餘生牛
衣僵卧長為農夫以沒世矣柴門寂寂無雀可羅而况
長者車轍乎敢圖荀龍薛鳳伯仲之間尚不遺忘先相
公翹材長缺之下客先之以一介行李之書禮申之以
式之玉季之親臨勞苦之緘彌勤加遺之儀益腴父老
驚怪泉石焜耀自顧一黃冠野人莫測其所以得之之
繇第極其所以感之之切多言為謝萬此有足耶未見

君子願言念門戶重大之寄佩聖賢毀瘠之箴古有韋平今有范呂皆父子鈞軸後先哀繡茲老夫所望於門下者其勿與庶人之孝競一槩之苦

某恭承介弟旆旄惠然照臨袖出伯氏尺素之書面授相國言行之實付以紀述詭之以銘章自視淺陋之學久矣就荒絕壑之思槁乎將落燭之武所謂少也猶不如人今老矣無能為也已亦安能搞詞振藻以頌盛德大業之萬分寫天勲鴻烈於千載使與臯伊先鞭周召

上風乎欲披襟則在蕪拙為己僭欲避席則在交情為
己踈三省九思累日不決而介弟言之而不置迫之而
不釋龜勉授簡惴惴靡寧然尚有愚者千慮之一吾家
子雲不云乎水避碍則通諸海人避碍則通諸理昔六
一先生作范文正銘其間書文正與呂申公事極有典
則務從忠厚而范氏子弟不知六一之深旨往往不憚
此意已託介弟口傳於足下矣十月之交可遣便了來
取也

某惶恐再拜僭易敬問相門玉壻即日恭惟尊尊幼幼
茂介春祺令弟府判郎中縣直閣府判司令棣鄂八龍
孫枝九鳳受祉山則廬陵有委不外頌貺筆墨香茗蜀
圖石器北果腊麋拜賜珍感之至

誠齋集卷一百十

欽定四庫全書

誠齋集卷一百十一

宋 楊萬里 撰

尺牘

答蕭國博

某伏以即辰仲夏之月南風之薰恭惟景伯國博鄉丈
教胃溫臬物望歸赴天棊可大台候動止萬福某老病
餘生乘化歸盡自放自棄之蹟惟幽屏之不暇淵潛之

不深姓名不入修門書問不至朝貴久矣誠不自意平生故人不間雲泥之異勢不忘貧賤之素交墮鯉封之斜行寫鶯鳴之軟語諏暄涼而訪生死自視陳人何以拜此成均封殖棟幹之圃也異時位三槐間兩社者孰非由此塗出願言寶珍之即對越西崑南榻之除以梯乎鸞坡鳳池之歸也某棄官九年回首雞聲茆店之月渭城柳色之雨久寄絕交之書矣而三子出仕中男次公去秋之官鴈峯長男長孺今茲六月又之官南浦小

男幼興九月又之官澧浦其勢不容不東征遂子如曹
大家也必不得已從其近者莫南昌若也又怯暑行冬
春之間乃可作汎舟之役耳來秋次公秩滿來歸老身
始有還舍之望兩年之間未有息肩之期良可憫笑抒
謝不莊伏惟財幸某恭承命戒先國太挽章靜菴記文
塵封破硯蠹蠹管城久矣龜兔各紬數語以塞盛意公
家醬醢當曰吾太公望子久矣荷荷

契家台姥即日恭惟受社山則有乏使否願承命幼興

每蒙燕集盛禮以開其客愁而紓其旅瑣感戢不淺寄
餉冰芽當為君開包碾春風煮湯候蟹眼也正恐無五
千卷可搜無十年讀可攪只與杞菊蒸莧之腸背城借
一耳

答胡左藏

某伏以即辰暑雨知時惠鮮秧兆恭惟季解判院契丈
容與駕行式法天府天棐勤肄台候動止萬福屬蒙便
了啄門賜以先集已嘗推謝小兒來歸重拜誨帖且餉

以黃草龍目離支矜之以為暑服則天勝細葛之含風
擘之以拈春酒則未減紅綃之裏玉降拜珍投則百斯
感某棄官九年所待一死自分與長亭短堠永矢絕交
矣而三子出仕中男次公去秋之官長男長孺今茲六
月又之官小男幼輿九月又之官其勢不得不東征逐
子如曹大家也必不獲已如從其近者莫南昌若也而
又未能暑行必也冬春之交乎至來秋次公秩滿來歸
老身乃有還家之望兩年之間未有息肩之期良可閔

笑都內之署相州稱圭蓋嘗居之矣相業權輿不在茲
乎惟珍重以須

答袁侍郎

某伏以即辰秋已小立暑猶未退恭惟宮使殿撰侍郎
尊契大奉瑄祝釐潛天見聖身在霞外望屬寰中三神
扶持台候動止萬福契家玉嫵咸慶某昨日有自城中
來者得報賜妙帖示教新作家人卦解義詞約理明如
斧析薪如水赴壑二五兩尤為易簡若乘此破竹之

鋒不數日可了此八卦矣何必如某旁搜幽討枉却
十二年之燈火乎拊撫風火等詞皆切中二豎所居者
醫和之目那得適疾當問閭而藥之也感極荷極易贊
敬為書一通且妄下一轉語又未知道著否晦翁可痛
孔堂兩楹遂折其一其闕吾道之興喪非細事也亦既
遣人弔祭之得其子文之報章矣敢復以為朋友唁也
願言珍重即看賜環

答徐用之知縣

某伏以即辰亢陽過中高寒已早伏惟用之知縣學士
寮舊以御祥琴孝思未愆神介台候動止萬福伏蒙誨
帖命戒先丈處士銘章業已宿諾何敢固辭顧老病微
軀文思荒落久矣先是此等文字多是大兒代作如錢
侍郎仲畊孫檢正之父諸銘吉州設廳諸記皆具筆也
唯莆田陳丞相葉丞相建昌張彥文尚書新安程給事
元成諸公銘詩乃平生或恩或游之至深厚者不勉強
為牽課耳今君房遠出禦說去家當徐圖之或親作或

令取代未可約五日一水十日一石也幸小紓之如已
就托黃廬陵轉致差易耳即聽新除

答廣東雷提舉

某伏以即辰廩秋過中顥氣以爽恭惟提舉郎中契丈
玉節光華使星淵在霜日所映海波不興三神相之台
候動止萬福某老病幽屏死灰不燃平生故人不得寄
之以叔夜之書而庭久無退之之跡矣契丈盛德無兩
高誼寡二獨迂拂天之旆左顧釣月之灣父老縱觀猿

鶴呼舞賢者自為人所不為野人有以致此客則否矣
遣騎墜誨撫存狎至先之以東京之玄纁申之以司業
之酒錢至於寶熏名果重繁照坐落英槁木頓回生意
冷憲凍壁皆作春溫書史龔生又辱收補輒人支賜月
給某無穎士之才安能使役者見愛而不去非故人此
舉則掉臂在旦暮耳多詞不足盡感之一字未見願言
愛此大業即還第頌之綴慰此老懷

某悚息再拜敬問契家台媿即日涼秋恭惟尊尊幼幼

咸集純嘏有委不外大兒前月二十一日已交職老身就養小須少男冬間之官澧浦然後議此行其上春之間乎令親伯珍近方得書過望過望

與衡州知府趙判院

某伏以即辰廩秋一半灝氣高寒恭惟判府判院新拜魚書輟從鷺序高牙乃建幕府初開神天是孚台候動止萬福某謹齋宿奏記司槩仰惟財幸

某自慶此生親見近世麟趾公姓異人林立時則有若莊

闕

之詩文時德則有若德彥之勲賢時則有若從善之
才氣漢之政駿唐之白賀方之徧矣今又側聞判府判
院妙齡嶄然卓詭絕出揮五色筆草三千牘掃千人軍
與寒士一戰而霸姓字卓犖光映千佛名經之中鳴絃
壯縣則如桑下之馴彩雉分月名城則如竹西之寫鳥
絲晚登春風玉笋之班已藹秀出班行之譽翩然厭直
自詭一麾清氣開衡嶽之雲高吟動湘江之水借曰遠
民之福其若海內之望青規紫禁式遄其歸子淵所謂

可倚而竢也某老病幽屏姓名不至朝貴之門十年矣
天誘其衷中男次公幸得走趨大府牛馬之下陳因之
修敬惟一覽而擲棄道旁云

某惶恐再拜僭越敬問台閤玉嫵即日秋涼恭惟尊尊
幼幼受祉山則廬陵有可効老聃之役驩以承命

某惶恐白事中男次公筮仕云初殊未更事幸得充員
衡之安仁監稅仰事仁賢之主人所謂人各有一天也
曠以慶雲照以德星霑以膏雨舍魯何適矣不勝舐犢

之私仰瀆聽衡之公無任主臣

答南豐陳宰

某伏以亢暘過中高寒已早即辰恭惟判縣學士契兄
三月報政千室載歌神明扶持台候動止萬福某敬上
記以謝先施未見願言愛重不貲之業對越選表之除
至望跂跂

某間者濶焉久不聞問懷賢念舊一飯無諼遣騎墜誨
再披三讀恍如瞻清峻而聆淙琤也鳴絃幾何時而學

道愛人之聲與風俱來以儒飾吏故應有此不敢望於
他人者耳某老病幽屏道旁之櫟過者不顧故人相存
之意誼風凜然足以追舊俗而回之感嘆不足推謝不
莊悚仄悚仄

某再拜敬問契家玉姪即日恭惟尊稚受祉山則有委
不外大兒長孺前月二十一日已庀職南昌小兒幼與
咸陽客舍每辱臨存尤感故意之長也諸司惟俞漕甚
厚今納一書因便送達契兄何待於此餘皆無一日雅

頌貺麗參至感徽筆二十枝聊伴空函匪報也

與俞運使

某惶恐白事故人南豐宰陳通直

名與先人同
從州從市

文學政

事加人數等所至吏畏其廉明民咏其慈惠某與渠乃
翁中書舍人安行兩同朝著情誼如骨肉父子交游二
十餘年此即今宰劇邑盤錯根節袞沸湯火墮男其間
不敢不勉然非外臺獨有之天幃以慶雲庇以萬間涵
以滄海難乎免於今之世矣某敢以為託渠今歲季夏

方氏職耳三月之間已有美聲年歲之間必有可觀恐
差次部吏此即得在門闌桃李之下陳不勝幸願之至

與羅必先省幹

某伏自先幹文直閣過普州之後久不得書去歲十二
月入城見益公云仲憲十月一日不祿聞問驚悼涕泗
交頤不知到官幾月竟以何疾而終天文大人三子十
一孫惟先丈仕官方將光顯而遽罹大故吾親萬里護
喪經灕潁出巴蜀歸葬里閭不使其父為旅櫬容魂千

辛萬苦歷盡艱險可謂大孝老懷忽聞來歸悲喜交至
歎重歎重久探無消息昨日得季周報老疾之身久罷
慶弔一二日間當遣幼輿奔慰先此奉唁且致薄奠更
宜節哀以終大事不悉

答羅必先省幹

某啟清曉已專僕奏疏馳慰尋當聞達行李交至伏辱
手筆赴告披讀流涕不勝悲愴護喪遠歸已即宅里又
為之喜也即辰秋寒云初緬維息肩小憩孝履支福乍

歸豈無可委襄事有地有日否京丞相親與某言渠家
上世皆用浮屠法葬之水火每歲寒食只來江臯酌酒
三爵燒紙錢數束即是上塚而京丈少年擢第致位左
輔可以見郭景純風水之說謬矣景純自遭王處仲所
殺子孫亦無顯者而後世猶惑於不識字之山人仲謀
价卿屢遷考妣暴骨再三以求富貴反招短折之罰老
夫家中三世窮儒並無風水願勿泥此不悉

答本路安撫張尚書

某伏以即辰一雨既霑顙氣初爽恭惟判府安撫華學
尚書聽履星辰移次翼軫元帥崇嶠上流繁雄五月政
成三神慶集台候動止萬福列仙之姥受祉姪兆某老
病罷眊受一廛於二天之下齋宿奏記孔夙不莫而兒
輩未行之間誨函已從天而降矣宜先者後宜和者唱
挽天河傾東海不足以諭此作也惟老牛舐犢之私仰
恩冰壺玉衡之清退而省焉謂借不逮戾於至公亦當
見笑於大方敢圖仁教答賜恩書垂華星而落雲錦諏

茹煩悉撫存勗愉先之以不忘于湖榜尾之陳人申之
以尚憶蹇叔坐上之半面夏諺謂貴人多忘始亦信之
今其然乎否也大兒學製之初當此巖邑微仲尼上律
之天疇之在上子美突兀之屋庇之在下難乎免於今
之世矣而來誨諭以舊令小縱胥輩不聳聊致詰政使
承後者省力父母昊天德何以尚此某與老妻相語
府公思斯若此深厚感甚至泣也至於某不才多病之
身一生寡偶幾覆車於太行沉舟於呂梁知難而退棄

官九載納祿再期寒士仰此五斗豈願尚幽獨而取高
譽辭實福而要虛名哉先人門戶日就壞墮已既不仕
而其子亦可以不仕乎於是驅其三子而皆習為吏非
父驅之也饑驅之也不然子老身孱然獨卧空山豈
得已而不已乎大兒察其素居無聊於是投其隙而進
迎養之說某重告之曰汝則順矣其若以身累人何汝
獨不聞夏諺所云乎中人十家之產寧日增一斛麥無
或增一容汝既竊祿於使家矣又挾而父與而母以滋

是能為主人增麥而反增客也可乎父子既似栢山之
鳴每念此兒之請雖不忍拒亦未敢從也不知此聲胡為
已上達大帥之衡聽乎得兒書云尚書面命之曰而父
肯來西山南浦皆有光華及讀來誨則又曰江山寂寥
久矣一傳先聲下至草木魚鳥皆喜色人間有傳台意
者云將輦修方伯連帥之職加待之以末至客右之禮
蛙廩鶴料亦與繼粟牙檣錦纜亦與浮家蓋父子窮愁
之所願欲而不敢請者我主公皆逆探其心而不靳其

賜矣如是而不感如是而不就則木偶人而已耳少男
幼輿方為裝以赴澧之監河將以良月行姑候其行然
後老夫婦之行期可卜日也嗣當詳告大兒并奏記以
聞焉先此以謝恩意之辱不勝大願願言愛重盛德大
業即持鉤樞以福祿四海云

答謝提幹

某伏蒙墨妙一訪生死慰於萬萬命戒先尚書家傳某何
人敢承授簡又有韓柳之擬尚書固不減柳文若名德

柳何望回至於某尚不足以充柳之衙官筆更而況韓
乎不敢當然一生學問文字之交四海才四五人耳而
尚書為最所命不應讓但作傳之說若作家傳則家人
子之任非外人事若作史傳則合於今上慶元元年日
歷中某月日書云某官謝某薨之下書云某字某臨江
人也云云如某修孝宗日歷作張魏公欽夫李壽翁三
傳是也今某間人豈敢作私史以抵吏議乎墓銘神道
碑惟命

答虞知能

某間者聞焉久不聞問遣騎墜教披讀三過喜如之何
蒙封示文直閣萬金之書寄聲於某商畧所書令祖雍
公言行欲以議襄陽兵事冠於篇首恐未可也篇首正
當書紹興辛巳江上督師一戰殲渠魁國之再昌舍此
宜無大者若道辛卯襄陽有警本路帥漕戎帥請發兵
而雍公不許妄動卒無它虞此特書之篇中足矣未足
以冠篇也文大又謂其文名雍志此又未之前聞也前

輩文集中止有曰墓曰銘曰表曰神道碑而已今創名曰雍志此為何等文書乎恐傳笑文士而後無傳也某今所陳者文大如曰不可則願請儒宗文師一代大手筆者為之某當再拜而避也

答建寧府傅內翰

某伏以即辰顥氣彌高積霖小霽恭惟判府徵學內翰報政代蕃易鎮河海神天送喜台候動止萬福某老病歸歟待盡云耳山徑不與東西行者會鴈亦不我過也

欲淮一字其道亡繇獨有人甚遠之歎遣騎墜教字垂
華星語洗晴雪忽覺致身李中丞之側喜如之何家集拜
賜三世文獻一朝快睹矧南宮望郎與游深厚懷闕永
肩讀二三策未竟而淚落不能收也玄穎既佳又悞學
落思軋無所事此什襲挂壁時一敬仰思王公而不得
見王公之所寄則如見王公焉占謝未詳願言愛重盛
德大業即持鈞樞用畢能事

答泰和卓宰

某病身無偶搔首忽忽偶聞剥啄柴扉者攝衣出問則
詩家者流寄聲訪問生死者披讀驚喜即辰良月初吉
積雨小霽恭惟士直西昌大夫契丈惠化告成為裴王
覲借留不可神人具依台候動止萬福送似快閣新刻
真蹟得未曾有鉅公衆作偕來多荷多荷徵惡語輒注
三絕句山谷有靈當笑小兒強解事也抒謝不莊竦仄
竦仄

與周監丞

某卧病空山祇有不如咫尺不見實同千里方寸尊德
傾之九回即辰小春淺寒恭惟高居萬象之臺獨立一
世之表三神擁衛台候動止萬福某惶恐小稟昨晚蒙
丞相寄聲彼此免冬年交賀之禮某本以老病棄官還
家求以休息而東西每歲建堂堂之陳以夾攻之豈特
楚人一歲七奔命而已無地可以詭姓遁身者忽聞慈
命頓解天弢敢以聞焉漢過不先仰惟執事實圖利之

答贛州張舍人

某伏以即辰小春淺寒苦雨未霽恭惟判府右史舍人
尊契大耋年政成二天化洽兩路披睹上流靜波神天
寵綏台候動止萬福某卧病山墅意象眇昏騎吏打門
玉字下墮思賢新記儒榮古詩聯翩而來珠流璧合七
言雄偉讀之慨然起封狼居胥之意古文雅健覽者宛
然逼真柳愚溪之作崆峒曉日之光章貢秋風之清忽
下照蒸藿之門吹闕冠之埃也至崇蔭丹筆之語尤足
破陰陽家流之邪詞解鬼神應泣之大惑有功於後學

不變於流俗不少矣恭承命戒記章貢道院或賦某學
落思涸何敢授簡長者有命又不容固辭當款款擬呈
別遣人來送似求是正也許為築三徑小亭甚榮第小
圃偏仄無地可頓去大江二十餘里為取材運甃勞人
費財切告賜免此心乃小安耳下稷天氣頓冷噓呵凍
指摧謝不莊仰惟洞視

與林總領郎中

某惶恐敬有賤懇小兒幼與愚駮不才初習為吏充員

澧之慈利稅官適有天幸廼獲趨事使星卿月之末光
不勝大願敢祈禱以仲尼上律之天庇以子美萬間之
屋訓迪之挈攜之全度之有萬斯幸再有稟白先是上
狀嘗以澧推吳承直瑯舉及四員政欠職司合尖一章
仰干台造乞特輟今年下半年或來年上半年一京削
以成就其改秩之榮更祈早賜剡發至懇至扣

與江陵府楊侍郎

某惶恐敬有賤懇小兒幼與愚駮不才初習為吏充員

澧之慈利稅官適有天幸乃獲趨事詩書之帥不勝大願仰祈禱以仲尼上律之天庇以少陵突兀之屋訓迪之挈攜之全度之有萬斯幸

與醴陵錢知縣

某伏以即辰苦雨未霽殊妨斂藏恭惟文季知縣國錄契丈暮年政成民咏神介台候動止萬福契家玉嫵均慶某老病侵加懸車待盡無足談者君子學道則愛人昔聞其語今見其人醴陵之民一何幸也廬陵今秋兩

月不雨兩月連雨前日大田可縱燎今日遺秉又生耳
矣潘縣歲事定復何侶小兒幼輿之官澧浦寄徑提封
敬令一拜函丈願扣囊底書以振德之所祝愛重大業
拭目壁水蓬山之除

與澧州趙守

某伏以即辰良月初寒積霖新霽恭惟判府太中幕府
肇開高牙乃建民咏何暮化孚崇朝三神具依台候動
止萬福某移病引年懸車山藪亦藉芒寒色正之末光

旁燭之也千里而遙何從晤對願言寶珍龜玉翔集孔
鸞桑蔭未移天子有詔

其竊觀近代人物眇然獨瓌竒特絕之產過半出於帝
家之璿源玉冰是殆有相之道時則有若判府太中用
周室磨定棣韞之英漢宗鴻寶苑秘之彥而挑青燈磨
破硯著鵲袍與四海九州之宴子鰕生角雕龍鏤冰之
技於饗蟲爆竹之場取先羣雄闕其口而奪之氣顧不
雋哉至於鳴絃歌有學道愛人之去思分風月有驥足

未展之嘉歎澧陽文獻是惟屈宋指瓊折瑤之窟宅也
橘頌衣鉢今有傳矣褰帷屬爾而令修於戶庭之間人
自得於湖山之外信矣類非俗吏之所能為者耶敢以
為遠民賀併以為江山賀非為執事賀也

某惶恐再拜僭易敬問駟馬高蓋之門閭風方壺之嫵
即日冬初恭惟尊尊幼幼受祉姪兆某惶恐有稟小兒
幼輿愚駸不才試吏之初適有天幸乃得走趨仰事宣
州仁賢之主人真所謂人皆有一天者某不勝大願願

轉之以仲尼上律之天庇之以子美突兀之屋訓告之
挈攜之震風凌雨今知免矣

答吳節推

某屬者便了送花之歸囊篋細碎之報語在前書矣即
辰苦雨未收恭惟景隆節推學士尊親以賓贊之良兼
守貳之重神介台候萬福親家玉嫵均慶小兒幼輿之
官監河得託懿戚之庇東坡與王定國書云吾兒即公
兒也何俟多囑唐憲文字再趣之矣

與葉樞密

某伏以即辰積雨新晴六合清朗恭惟觀使大資樞使
相公珍臺間館臯伊冠倫御風騎氣松喬擁衛鈞候動
止萬福某伏自昔歲吳推遣便了詣福唐因之奏記及
其還也報以雲錦之書華星之字此惠已私多矣而又
餉以荔子石巨之珍芳紅綃玉膚光映冰盤江風海雨
寒入牙頰野人藜覓之腹人世烟火之腸坐覺三洗而
九滌也榮感欲次骨矣先是鈞樞台鼎小移天府之躔

橐兒戟纛整作三山之行竊意皇上未察必謂是役也
周公分陝行且式遄其袞衣裴度鎮洛方將注想於元
老不悟其假此以釋寵榮翩然而還里第也某不勝主
臣敢有白事頃者不度分守僭以親戚澧州推官吳承
直操舉員踰七望八已三員輒仰干造化乞賜鈞播即
蒙千金之諾以來歲上半年京削收錄之且頒以照牒
矣今茲嗣歲至矣再遣便了駿奔以請奏牘一類文書
敢以給畀此僕以歸有萬其感抑過於某受此恩也今

晨始霜病指欲墮噓呼凍筆墨淡字歌惶恐惶恐宰席
虛左止俟我公之歸告廷風雷四海傾耳

答隆興府黃倅

某伏以小春淺寒積雨初霽即辰恭惟判府太中年家
天共理帥藩同宣皇化民咏豈弟天迪仁賢台候動止
萬福某老病不敏致敬小稽死罪死罪未見君子願言
愛重大業即登春風玉笋之班

某幸甚辱在先太中龍虎榜之末陳簡若姓名之下如

五緯天垂四嶽玉立顧公出我處梗斷不逢庸非咄咄
怪事耶台座挈國躋民之業敲金擊石之文挾斯具遭
斯世干青霄而直上凌太空而徑度宜也顧俯同濂溪
之集章貢闕定而來淮海何歟將西山之英東湖之神

俟吾墨卿臨之求偉詞俊語滿袂落霞秋水之寂寞歟
某老矣而大兒有迎養之請大帥詔寵招之書倘負薪
小愈尚堪力疾一往則見賢人傳賢書天其卒相儂家
歟而尺素修好乃辱其長者先施焉薄雲之誼篤矣策

馬之殿忸矣負荊之謝遲矣

某惶恐再拜敬問年家神清台嫺即辰冬寒恭惟尊尊
幼幼受祉姪兆有廬陵委願畢力某惶恐賤懇大兒長
孺愚駭不才冒試剝邑適有天幸得趨事介師之下風
東坡與王定國書云我兒即公兒也敢以此自歸於門
下惟二天覆露而全安之

誠齋集卷一百十一

欽定四庫全書

誠齋集卷一百十二

宋 楊萬里 撰

尺牘

與徐丞相

某伏以大冬有倣霽暉未舒即辰恭惟觀使大觀文左
丞相上能芒寒造物與游霄垠咸若河嶽盡護鈞候動
止萬福恩闕相嫺錫羨姪兆某山鹿野麋之姿夫須獨

速之生耄矣病矣已矣於身外事於人間事恍兮如隔
世矣猶有痛掃溉而不除者胃中一點耿耿感激投分
之意氣不侵久要之然諾雖欲如寒灰之不燃槁木之
不芽病未能也而况野人之塊辱在化工大鈞之播寸
草之心未報陽和三春之暉是可忘也孰不可忘也然
雙鯉尺素之敬有虛目於中涓千里命駕之約竟寒盟
於載書不知肉黃頭白眉高頤隱坐則有垂釣之偃行
則有可笑之蹙而然耶抑亦石齧我趾龍覆我艇陸則

有犖确之徑水則有洶歔之濤而然耶每一念之未始
不作惡數日也若夫清風明月必思玄度高山景行獨
仰仲尼皇天后土實臨此心側聞相君潭府與珠履落
之久矣東望佳氣想見綠野之堂碧瓦拂日翹材之館
華裾織翠獨樂之園花竹秀野反顧荒傖曾不得羣燕
雀侶龜魚於上下曳長裾彈劍缺於前後良可憐哉廬
陵自七月十三日不雨一行槁乾至九月一日大田可
以縱燎自九月二日雨一行霖淫至於今日遺秉又復

生耳餘生逢此咄咄書空坐待土銼之不煙塵甑之不粒也老瓦盆癭藤尊不待寄嵇叔夜之書而鄭不來矣三衢歲事定復何似丞相袖中有作霖之手而小斲於九州四海獨不可貶及於隣里鄉黨乎專走便了奏記東閣畧無一物可以伴黃耳者竹萌五十斤人面子乾餘甘乾各一十合晉越贄諸道人真所謂野人之美芹子雖有區區之意亦已踈矣惟不標而出之大門之外有萬其幸天扶柱石人僊鹽梅可不寶之珍之愛之重

之以答揚其意耶以公歸兮之雅尚能為聖世廣載之
再與徐丞相

某屬者專僕奏記恭相聞達茲復賤懇親戚澧州推官
吳承直瑯頊蒙鈞慈頒照牒舉辛酉年賜上半年改官
親民任丞相一倡羣公並和今得舉主四員矣嗣歲且
至渠今遣僕奏記拜請奏牘一宗文字敢祈鈞旨願指
典籤特賜剡發以授去僕以歸有萬其感恭惟如天之
恩某實並受之

答新車輅王判院

某伏以積雨新晴六合清朗即日恭惟子林判院鄉友
歸軒錦繡待綴班行神介燕喜台候動止萬福某恭審
錫綸言於殿城除州府之戶郎寄徑于斯亭衡者乎惠
我無疆言之不足寄贈潭帖古碑柏燭皆清且佳敢不
重拜惟為斯文自愛當有夜誦子虛者

與衡州陳通判

某伏以即辰景迫週年霜酣日霽恭惟判府太中分月

湘江開雲衡嶽民咏豈弟天廸仁賢台候動止萬福某
不慙耄及慕用下風吉蠲穎泓徽名謁者邈未瞻進賢
之冠輒進保金軀之頌式竚驛召怒飛鷄行某蓋嘗究
觀近代人物之鼎盛莫三山若也而鼎盛之中萃乎冠
出者孰居太丘子孫之右者前有兩博士之制科後有
一樞相之斗魁磊磊相望日杲星垂宗不乏人執事以
撐霆裂月之筆收片玉一枝之名清風震山游刃破竹
年甫強仕而聲已溢世昔人謂士元非治中別駕不足

以展僕則謂雖治中別駕亦未足以展執事也然東坡倅杭潁溪倅處在二先生則不為遇已顧不為兩郡江山之遇耶僕是以不以衡湘為執事慶而以執事為衡湘慶今人恐未知耳若老朽之人方幽屏待盡猶及見執事之蜚鳴也及今相聞獨不可乎惟執事財幸

某悚息再拜敬問台閔玉壻即日恭惟尊尊幼幼受祉山則有廬陵委顧奉承之某惶恐僭有至懇中男次公不習為吏自試譏征適有天幸乃得走趨服事于旗纛縣

旄麾之下親炙薰陶于宗師道德之側抑諺有之鄭渠
無旱畝崑山無礦土前之說以徵恩紀之闕後之說以
勻樂育之惠惟執事垂意焉

答范監稅

某伏以凋年受代嗣歲來歸即日恭惟判院直閣契丈
新除近天神介台候動止萬福某間者闊焉久不聞問
乃心尊德無頃焉置忽覽誨帖驚喜不勝恭承來諭知
先集刻印行矣僦功將有分賜於野人者病眼作花苦

無異書以金篋之日俟此賜如饑腸雷轉而望朐蹠如渴肺塵生而須危露也未見願寶珍大業立俟明廷孔鸞之集

答贛州張舍人

某屬者行李還返因之奏記以謝嘉惠且一再思以妻姪孫羅令瀛為門下薦乞特輟今年上半年首章京削以為破白之舉茲辱遣騎墜以玉字之書諭以金諾之實天帥之橐兒戟森甫西柄而春風已先到河陽之桃

李寵恩特達何異老身之親得出于其門也多言不足
寫中心之感官壺拜賜臨行遺愛而不忘一野人況十
邑之毗乎書吏續食併深銜戢錢行二詩別紙呈似依
依知己之意抑亦見孩兆之一端云

與湖北傅提舉

某伏以即日由元至人猶寒已暄恭惟提舉寺丞登攬霜
清寒采嶽動百吏震疊羣黎謳謠天迪神保台候動止
萬福某謹三肅九頓首奏記謁者仰惟財幸某半生漫

仕十里九山常摧輶焉顧獨有負恃而矜喜者不曰盡
交天下之名勝乎而其尤者則未有過於草堂一家之
父子兄弟間者也初與侍郎公同朝一見如舊相識繼
與郎中公同朝立談到金石處最後與內翰公在朝則
遽羽在外則合符僕之於執事事契似不薄也然有遺
恨者識機未識雲覩元方而未覩季方也搢紳先生曰
執事詩似父似兄德業節槩似二祖其氣亦宜過之無
不及也而尚秉孟博之車董壽昌之便宜乎否也惟執

事小須之時有求于執事者非執事者有求於時也某
老矣病矣已棄人間事矣不敢復讀天下之書不敢復
言天下之事矣然猶惓惓於執事者而不去者詩人不
云乎空餘見賢心忍渴望梅嶺執事幸無忽

某惶恐再拜僭問列戟拂日之門安期羨門之嬖卽辰
恭惟由尊及稚茂介春祺某也里屋庸居無一事可以
効牛馬走之役者願承命戒某惶恐致敬之初不應及
其私抑聞之莞彼柳斯鳴蜩嘒嘒言大者之旁小者無

不容也第三男幼輿駢不更事初學為吏今充慈利監
稅之員適有天幸乃獲走趨服事一世之先生長者諺
云鄭渠無旱晦崑丘無礦土前之說願以徼福繡衣使
者覆露之恩後之說願以沾勺巨公教育之恩惟執事
惻之

答本路彭提刑

某恭承使華賜以誨墨發襲六為七之學摘駢四儷六
之詞如遺所尊豈僕敢拜敬以歸納仰乞賜知趙戶荷

領畧欲見職令之辦渠于台造旦夕必自呈爵里也某
惶恐復有至懇南昌令長孺乃某長男也不才試邑適
有天幸乃得趨事繡衣之下風敢祈先生長者賜以萬
間廣廈之庇或他時考察所部官吏之殿最願沾丐薦
墨之膏潤寒士寸進繫此一援手千鈞之巨力抗之則
九垓之上棄之則九淵之底惟仁人動心焉不勝祈扣
深切之至

答臨江葉守

某伏以維仲之冬積雨新霽即日恭惟判府判院契丈
流化名城暮年報政民樂豈弟天迪忠賢台候動止萬
福今茲書雲蒨緇迎日舒長陽氣潛萌君子道長袞對
小至瑞慶大來某以國卹不敢哦烏拊缶之音為巍
巍大厦之賀反勤長者勞之賚之天落雲錦之書月對
華星之字三反九復清風襲人又重之以縹玉之酒金
漿之醪先薦屏攝洗琰開嘗漢之蘭生隋之玉薤沙洛
之綠郵程鄉之若下風味勝絕何必減焉冷窓凍壁頓

生春溫有萬其感契丈以石林先生之聞孫祥刑使者
之賢子芝蘭玉樹趾美前芳文學政事兩有家法平易
近民之聲中和樂職之頌風自北而南洋洋盈耳也乘
此一陽之復遂膺三節之召徑登春風玉筍之班某也
蓋日望之高蓋列榮之門安期美門之媿即日恭惟尊
尊幼幼受祉山則廬陵豈無一事可以効牛馬走者驩
以承命

答本路彭提刑

某屬者上記以謝刺薦羅親之恩蓋出于聞而知之也
既而羅來訪具能言契丈所以延佇者甚厚既飲食之
又餽贐之又命舟以載之其擾清治端不少也愧感何
已茲復蒙遣騎墜教申之以名酒之餉兼以石刻且辱
妙句寵和壓倒倡者拜受有萬其感舊苦臂痛偶三子
皆之官無分勞者罷於書問舊疾復作不能執筆敬請
女婿陳丞代書此心殊不滿也併幸台恕

答萬安趙宰

某伏以即辰至後景長積雨小霽恭惟載道知縣朝議
契大鳴絃政成民咏惠和神勞豈弟台候動止萬福近
新進奏判院曾仲卿相過極談龍頭書院絕境江鄉未
有恨不得飛墮其間觀文物之盛也茲蒙遣騎墜教有
霜柑黃雀山藥之餉厚意所臨拜受珍感舊苦臂痛偶
三子皆之官無分勞者罷於書問舊疾復作不能執筆
敬請女壻陳承代書此心殊不滿也併幸台恕

答隆興張帥

某恭承緘翰累繭重以名酒旨多洗琰開嘗漢之蘭生
隋之玉薤沙浴之綠酈程鄉之若下視此風味之勝絕
何必減焉榮感之衷已奏記推謝矣別楮又勤親染華星
之字煖律之詞燠休狎至連雲無栖病身莫寄而嚴鄭公
之眼獨為少陵野老而青焉窮途易感不知老淚之沱若
也小男幼輿前月二十四日已之官澧浦之監河矣而天
寒既降老妻有小痼疾怯寒特異待春微和當議行期也

答福帥張子儀尚書

某伏以即辰書雲蒨綯迎日舒長恭惟判府安撫華學
尚書尊契丈台斗祥光詩書元帥威惠允洽天人咸若
袞對小至瑞慶大來台候動止萬福某昨六月間新安
福林簿侍問來自三山云有歸者某因之奏記以賀建
牙且謝戟纛出修門之日賜書告行其中稱某與徐達
書酷似柳子云者今蒙高誼不遠千里遣一騎寄雙魚
驚喜披讀乃知此書未遠何也契丈幕府肇開曾幾何
時而平易近民之聲中和樂職之頌已與風俱馳與川

爭流君子時雨之化儒者德風之政故應如許類非俗
吏之所能為也而來教乃謂自令似之官之後頗起歸
歟之興何也西京之韋父子丞相本朝之呂大小申公
公家先正大參裡靈在上門戶之責不責之賢孫而誰
責也契大勉之頒貺羅池蕉黃漆園縣器君謨水蒼之
鏤鍊師蛺蝶之羅歲時雜記又得而書此異物矣降拜
不勝感戢之至辱問近詩今有山居雜興二十四絕句
謹錄呈似未見君子願言珍重乘此一陽之復遂膺三

節之台先之以世官申之以韋呂旦旦望之

某惶恐再拜敬問契家玉嫗即日亞歲令節恭惟尊尊
幼幼受祉山則大兒長孺近七月庀職南昌縣事中男
次公去歲仲冬庀職衡之安仁稅務小兒幼輿前月下
潯啟行赴澧之慈利稅務仰蒙諏及故稟有委願承命
戒

答贛州張右史移廣西帥

某今月十一日已令書吏龔世榮持斐然之文呈似矣

今辱遣騎下教乃十六日之書蓋兩不相值偶然參差耳計程當已上達也恭審帝謀元帥公應疇咨自玉虹翠浪之鄉建羅帶碧簪之纛恭惟懽慶某偕有至懇妻姪今從政郎靈川令羅瀛既冠收科能文敏政幸得事詩書之帥敢乞先生長者特輟慶元七年上半年一京削為之破白以薦一經拈出諸司咸和不翅某受此恩也拳拳至扣

答臨江葉守賀年

某伏以即辰自元至人猶寒已燠恭惟某官昔年而化
千里而謠神明扶持台候動止萬福某黃冠野夫又逢
獻歲遐想畫戟森衛華裾如蔥躋彼公堂稱觥介壽隔
一帶水罔克駿奔寸心悄然獨有跂跂乃特蒙行李墜
以玉書慰存勗愉訪問生死三肅使者感榮萬斯占謝
勿草何以報德上言加餐飯下言長相思先賦是詩以
為善禱卿月昇金掌王春度玉墀後賦是詩以為善頌
云

答隆興府張帥

某伏辱專介疾馳中宿而至手札下逮累百其詞報以大兒屬疾之詳既遣和緩以視之又委斯立以生之曲折指縱戒以持重朝暉間反復商畧家藏萬金之良藥輟以餌之古人三年之宿艾訓以炷之小變則為之慶顛小退則為之解顏竟與起死可謂更生叢溷小官愛若己子燾載鞠育之恩何以尚之奉教感泣以喜以悲亦得大兒親書報以小愈惟是銜恩載仁不知所報抗

回之草顧印之龜未憚由衷之萬分也以謝一二仰惟
訾省

某恭承行李狎至恩書單傳將命兼程而駿奔及門者
弗越於信次先諭之以兒疾之小愈申告之以兒體之
復初深惟生死肉骨之恩私彌覺河海華嶽之淺鮮何
以論報莫知所云當令此兒効死門下抑折骨絕筋而
後已奚服箱厯塊之足辭因不足於使令而僅能執筆
抒謝以後矣不勝主臣

與湖廣總領林郎中

闕

孔

邇恭惟驩慶某小緩修賀乃辱相先遇以三子皆出無
分勞者罷於書問臂痛復作自此恐與管城子永絕交
口占刀筆吏摧謝併惟大貸

答安福徐令謙亨

某伏以即日至後晴寒恭惟安城大夫徐君執事惠化
宜民廣譽旁達有相之道台候動止萬福某生無他好

而惟文詞之好顧近世古音絕響久哉談學問者薄之
以為技驚儼偶者歆之以為淡於是退之之五五可薪
而南豐之八珍可屏矣誠不自意彭蠡之濱有執事獨
奏人之所莫奏而味人之所不味頭白肉黃之叟竊伏
林下聞其風而悅之豈不屬垣其霖雨崩山之遺音染
指於函牛獻龜之惠餒哉大兒長孺曰翁嗜之兒有之
當奉翁啖也斗數敗篋未始云獲而大瑟中琴山膚海
錯畢陳於前矣滿聽清鏘大嚼雋永何其奇也又何其

富也如論盜書見憂國之遠圖如總壁記見勤民之深
惻如無盡記續愚溪之斷絃每竊嘆惜古文其遂息矣
延斯道之光以炳來者不在執事其將焉在楸之竟之
進而益進其又有弘

某惶恐白事廬陵兩年旱潦而吉水為甚且如貧家歲
收鄉米小斗九百餘石而去秋放佃戶田租主分米四
百石他戶可類推也恭聞使司移文委本州趙倅同吉
水宰秦鑑和糴米二萬石此聲一傳民戶駭思若乘去

秋八九月米熟之時糴之尚恐無可糴者而使司之命
乃十二月之命今民間安得餘米以應公上之糴乎萬
一州縣奉行則號令必峻追逮必急穀價必倍民食必
艱敢望上應列宿之暉下燭民瘼特與改命速行任糴
則一邑生齒免轉徙他邦捐瘠溝壑仁人如天之恩何
止活千人而已秦宰有公劄子來求某一言於使臺併
以呈似

答經總左史張舍人

某恭承一介行李墮八法親書寄以三碑拜受竦感適
此小溪驟漲春雨斷橋亦無抑陰之小舟可以利涉者
而又野人蝸牛之廬門不容轍巷不容軒元戎小隊纓
兜拂日旆旌降天前茅所次羅闐所呵將於何以頓之
得免照臨乃幸乃荷草草摧謝十分未見其一端也
靈川羅令瀛已荷季諾賜以襴章敢望終惠

與周丞相

某累得謝幹峴書云丞相許為其先碑題蓋今此文已

就敬季陳情特以呈似文有傷理有避礙有害辭者願
即塗改復擲還此本當一一師用先是石人峯詩仰勤
妙跋詞藻滂葩源委洞徹盡發曹劉李杜未覩之秘觀
者以為某之詩真足以當此不知老先生眼力到處胸
中蘊此一段詩評久未吐此特因某而發故借石人峯
以裝鋪席如子美之黃四娘退之之毛仙翁東坡之雲
龍山人半山之方仲永耳所謂周子之兄之前不得談
莊生之化為蝶也荷荷長孺次公幼輿前後皆拜薦稱

卷一百十二
之墨三子之免且有進寸之望矣感恩豈有涯哉

與淮西韓總領

某惶恐白事廬陵兩年旱潦而去年為甚五月大水自
六月不雨至於九月幸而間有陂塘車戽者救得三五
分而十月一雨連五六十日高者生耳下者為泥土且
如貧家歲收鄉米小斗九百餘石而去秋放佃戶田租
主分米四百石他戶可以一葉知秋也屬者恭聞總卿
曾丈行下俸廳收糴米七萬石趙倅及州民上下恟思

不知所出趙君即具公文乞行蠲免適有天幸而台座
肇新總臺之政仰蒙特免其半此恩不貲州民始有更
生之望然此舉若乘去秋未熟之時糴之尚恐無可糴
者今民間旱後入春安得餘米以應公上之須萬一尚
糴其半則州縣奉行號令必峻追逮必嚴穀價必倍民
食必艱敢望上應列宿之暉未忘舊部之民特與改命
盡與蠲免則一郡生齒免轉徙他邦捐瘠溝壑仁人如
天之恩何止活千人而已趙倅以某受門下知遇不淺

來諉某為邦民一言有書來囑敢併以呈似

答吉州趙倅

某屬嘗奏記仰干使廳給榜約束水利事特蒙報教其
應如響一鄉之民鼓舞恩紀何必減于威茅旌之謠不
寧唯某一家耄稚之感恩而已茲領誨帖命戒韓總領
免糴之書尤見勤民之仁心某亦受賜一人之數聞之
距躍三百驩以奉承敬以呈似覽畢望順指書吏緘而
蠟之幸甚

賀本路俞運使赴召

某今晚得邸報恭審契丈膺受璽書徵還金闕即傳除
目遂冠從班恭惟驩慶某辱在與游之末其喜其抃尤
在人先老身遠跡欲送南浦其路無繇敬哦唐律兩章
以餞班公登仙之行惟一覽幸甚

答湖北趙主管

某昨蒙維舟江湖迂轡山墅猿鶴驚喜泉石焜耀老病
之人何榮如焉伏承誨帖如遺少室元直之藥四客鄉

三墨兵一周粟誌拜受至感徵小詩今以呈似諸公牛
腰併歸行李

與湖北唐提刑

某屬者一再奏記尋當徹聞茲復三瀆未語先忸伏自
台座未登攬之初嘗亟以親戚澧州吳推環為薦亦聞
進拜即辱異知稱賞其才而歎惜其淹許以論薦而告
以少待此意已不貲矣然諸公間皆薦人來那馳未行
極知區處不易今則上半年文字已不敢希覲矣某亦

豈敢咄咄相逼耶吳推秩滿近在今冬考任過足已有
舉主四員所大闕者所極緊者正患未有職司與合尖
之章也二者之恩舍門下誰適者代者今夕至則詰朝
秣其駒矣嗟乎殆哉岌乎某誠不識好惡干控萬告欲
望台座特輟今年下半年一京削以成就之吳推一生
昇沉視此一舉豈惟吳推感此幬載生成之恩某實並
受之諸公所薦多有初到任者似未渠晚也意迫詞危
併祈未督過之尤幸尤幸

某恰作此書間忽得大兒知南昌縣事長孺遣人來報
示小兒幼與誤蒙異顧特招入臺暫攝幹官老夫婦聞
之驚喜伏自惟念非常之寵不貲之恩孺子渺然何以
堪此連雲大廈遂得託而棲九里洪河遂得挹其潤豈
不謂之如天之福哉更望先生長者教育後進訓迪其
所未能涵容其所不逮終始庇薦而全度之不勝大願

答吳節推

某昨晚長孺遣人遞至手誨諭及唐憲文字事冰民之子

蟬翼之力不能成事至勤再三今復往唐大一書就令
南昌人持至武陵憲臺投下却詣澧浦奉報仍批成幼
輿令時復一提之也懇切之詞不遺餘矣後欲復作幾
以加矣其濟與否非所以及矣公幸察我公幸恕我花
皆奇品千葉無價第石門劉氏二株皆未見花枝葉一
色一種也去秋來書云二種非也

答新淦縣鄭宰

某伏以即日禊事孔邇毛空峭寒恭惟判縣朝議契兄

學道愛人期年報政民咏神聽台候動止萬福某敬恭
上記以謝先施伏惟財幸

某屬者遭朝文天侍郎退一字之行意氣金石亦聞梧
竹鸞鵲五色炳蔚剝欲滿聽我談以濯軟紅役役卒歲
竟乖微尚遺恨逮今敢圖誼槩崇崛先我繼好一封雲
錦下墜荆扉訪問死生激烈哀懦自視歔然何以稱此
惠也侍郎起居狀遂得剽聞便覺玉立長身在吾目中
欣遇豈少哉最聲藉甚下轉上聞密縣故事曾謂泰山